

Biografía di Arturo C. Herrera (Tuyo)

Arturo C. Herrera a nace dia 9 di december 1952 na Aruba. Su mama a dun'e e number di cariño Tuyo. Number di su mama ta Betty (dfm) y su tata yama Alfredo (dfm). Su mama a nace na Aruba y su tata na Venezuela. Su mama tabata 13 biaha na estado di cual nuebe yiu a nace y bira grandi. Tuyo ta number shete den su rumannan. E no ta casa. Su ex-señora a dun'e tres yiu. E prome ta Arthy kende a nace 26 di juni 1977, e di dos ta Alfred kende a nace 17 di april 1979, e ultimo ta Achmed kende a nace 16 di februari 1982. Den famia tin hopi tocado. Na Tuyo su cas diferente di nan a contribui of dedica nan mes na musica.



Segun Tuyo e bida artistico a nifica parti di su bida

Pa Tuyo e ta un parti importante di su bida. Of e ta ocupa, aunke e no ta mucho mas activo, pero e ta keda un parti di su bida.

E bida artistico

Tuyo a cuminsa canta na scol, el a canta den koor. Un dia su ruman homber kende tabata un guitarista den un banda cu yama VIP, tabatin mester di un hende pa compañ'e pa e por train su solo. El a cera Tuyo den un cuarto, hinca un guitarra den su man anto e di cu e tin cu siña toca e guitarra den un ora of un ora y mey, pa e compañ'e cu e cantica. E prome acorde cu Tuyo a siña tabata un sol. Anto bon, esey ta djis pa compañ'e un dia cu casualmente con bay bin Tuyo no a bay scol. Pero kico a pasa? For di e dia ey, Tuyo a cuminsa mishi cu e guitaranan cu tabata den tur skina di cas. Rudy tabata toca, Jossy (dfm) tabata toca, anto tabata tin diferente guitarra spaño semper na cas. Pocopoco Tuyo a cuminsa interesa un tiki den musica, pero na su estilo. E tabata un hende cu ta scucha y wak con otro hende ta toca.

Su otro ruman homber tabata den un banda cu yama "The Bees" y nan tabata toca hitnan di añanan 60 di siglo pasa. Riba un diaranson cu e banda ey mester a toca na e contest di Reina hubenil di carnival, "The Bees" mester a toca den stadion, luga diamars e bahista a dicidi di lanta bay cu un steelband Venezuela. Diamars anochi e manager di e banda a bisa, wel Tuyo mañan abo ta siña toca baho. Abo ta bay toca baho mañan, anto el a exigi un training 10 or di mainta pa despues Tuyo toca anochi. E mester asiña toca e baho ey, anto Tuyo no sa nada. Simplemente e mester a toca fo'i cabes, e tempo ey ta cu duim, nada di profesionalismo. E joke di henter e cos ta, cu e baho tabata mas grandi cu Tuyo! Final di e storia ey pa Tuyo bisa e berdad, nan a toca e anochi ey tres cantica.

Tuyo su prome toca den su bida den menos cu 24 ora cu el a mishi cu un baho pa prome biaha den un Stadion completamente yen!




Tuyo durante un presentacion

E ultimo tabata un cantica soul anto pocopoco cada un tocado a baha fo'i escenario y por ultimo a keda Tuyo cu e drummer. E drummer ta baha y Tuyo a keda riba baho su so. Esaki tabata su prome toca den su bida den menos cu 24 ora cu el a mishi cu un baho pa prome biaha den un Stadion completamente yen! Asina Tuyo a cuminsa toca. El a kita e miedo di ta dilanti un publico grandi. Esey ta locual realmente el a haci. Mas despues el a sigui toca, anto na caminda el a cuminsa raya pa e mesun banda ey "The Bees". Despues Tuyo a haya su mes ta cuminsa toca cu un banda cu yama "Young Adventurers".

E tempo ey, e banda tabata milita hopi na Rooi Lamunchi y tambe na Isla de Oro. Nan tabata toca casi tur fin di siman. Despues di esey, Tuyo a bay pa Dedhalavi Combo na aña 1973. Esey a bini door cu un musico masha grandi mes cu tabata Victor Camacho (pianista y organista) a bay Hulanda pa bay studia. Dedhalavi tabatin mester di un organista. Te dia di awe, Tuyo tin di gradici Lando Garcia cu e tiki keyboard cu Tuyo a siña toca. Tabata Lando kende a tum'e na trabou sin cu Tuyo tabata sa kico ta un keyboard!

Desaroyo musical



Dedhalavi Combo

Tuyo ta duda cu tin cos cu un hende a siñ'e, specialmente den musica. Fuera di su ruman homber cu a pone e guitarra den su man, niun otro hende a siñ'e nada mas. Den combersacion of tocando, Tuyo ta gara e cancion ("pick e up"). Cu Dedhalavi Tuyo a toca dos aña. E siguiente banda cu e por corda tabata "First Amendment". Un banda cu e ta haya te dia di awe bon y pa e tempo ey sigur e tabata un atraccion increibel. E banda a wanta seis pa ocho luna, pero el a domina Aruba completo. Segun Tuyo den Musical Time, pero e tempo ey nan no tabata yama asina, nan tabatin un otro nomber prome cu nan a bira Musical Time, el a milita te cu aña 1976.

Experiencia riba tereno di musica

Na un fiesta di casamento di Tuyo su primo, el a topa cu Efraim Benita. El a invita Tuyo pa bay toca den hotel. Tuyo di cu e por bin cu un gay cu yama Michael Edwards y Efraim ta bin cu e drummer Chito Romero. Efraim conoce e manager di Tamarijn Hotel. Nan lo bay acerca e homber pa un trabou of loke sea. Nan a bay asina ey sin train nada. El a duna nan e trabou, despues nan a bay train. Asina nan a lanta e banda na aña 1975 pa 1980. Tuyo a biaha tur caminda. Despues di Tamarijn, Tuyo a bay Manchebo cu cual en realidad a bira manera su cas, pasobra cada biaha cu e kier bay, di un manera

of otro Cohen (dfm) ta pidi Tuyo pa bin toca bek, anto unda e bay toca e tin cu cumpra un orgel pa Tuyo si. Esey ta Tuyo su unico, exigencia, pasobra e tabata toca solamente cu un tipo di orgel. E por a toca un Yamaha combo orgel. Esun cu Victor Camacho a laga atras, esey ta e unico keyboard cu e por a domina. E no por domina niun otro, pasobra e no tabata hende cu ta gusta experimenta. Tuyo a pasa den hopi cos, pero cu e por corda despues di Manchebo, el a habri e nichtclub La Taverna den Aruba Beach Club na aña 1977.

Tuyo riba orgel, Benita como drummer y cantante y Roy Lacle riba baho. Aruba Beach Club a paga nan un luna pa train, prome cu habri e luga. Anto den un luna tabata Tuyo su prome experiencia cu *sheetmusic*, danki na Roy Lacle.



Tuyo tocando baho y canta


Tuyo a drenta musica bek cu otro forma di pensa, cu experiencia y cuminsa wak musica y bida completamente diferente

Pasobra e tabata busca moda di bay mas padilanti den nos tempo. E tabatin su canticanan, busca y pone partitura. E ta yega dal bo cune. Ey ta caminda cu Tuyo a bira berdaderamente interesa den musica. Despues cu mi a bin di Hulanda na año 1988, Tirso Kolfin a pidi mi pa un banda, asina ey Tuyo a drenta den e tereno di musica bek. El a drenta cu henter un otro mente di un hende mas grandi, un hende di experiencia y a cuminsa wak musica y bida completamente otro. Anto asina ey Tuyo a topa e mes un guy cu el a cuminsa toca cu ne den “Young Adventurers”. El a bisa cu e tin un banda.

Tuyo a bay scucha nan y por cierto esaki a bira e prome banda cu el a dirigi. E drummer Eugene a fayece, Goyo tabata riba keyboard cu un CASIO pareu, Frenk Kock riba baho, anto Gabby Ras riba guitarra. E tempo ey, Tuyo kier sa cu e ta e delaster hende cu a drenta den e mundo di MC 50 (Roland sequencer). Despues Tuyo a cana su caminda bon cu ne si, pero tabata delaster, e tabata poco fada di cos ey. Anto pa yuda un of otro musico aki na Aruba, Tuyo a haya su mes cu e MC 50 riba escenario. Anto e ora si Tuyo a yega na e punto: if you can't beat them, you must join them.

Sugerencia pa futuro generacion

Riba tereno di musica, Tuyo lo sugeri pa asina bo ripara cu un mucha tin un tiki habilidad pa musica, pa trata di guie cu les, pasobra e ta kere cu les, principalmente les di piano ta hopi importante. Piano ta un instrument completo y despues e mucha por bay practica otro instrument cu e ta desea. Su man robes y drechi, segun Tuyo, ta bon pa e keda practica te ora e cansa, bay na e dos diferente clavenan (di man drechi y man robes) y e por sigui bay dilanti. Esey Tuyo ta kere cu lo haci e alumno un musico.



Sr. Arturo C. Herrera y su guitarra